





葯園詩稿

余儻杭州與時賢往來共推吳子尺鳧爲藝壇之宗嘗
講學沈昭嗣園集諸方主客不設司錄而尺鳧以下坐
論格物同異一時學者多稱之顧尺鳧好自秘日居深
巷蒔花種竹足不越戶外而車轍常滿且有千里命駕
留幸舍而數晨夕者以故流連文酒間嘯歌子汝積其
所爲詩而久而成帙於以問世余思韻文雖細事顧時
習升降輒成運會尺鳧自抒其所學不務爲趨逐而稟
經酌雅動合古法昔所稱彬彬質有其文者斯詩有焉
特世鮮實學即詞章出入亦徒恃誇飾爲一時標榜而
尺鳧不然曾於

葯園詩稿

余儻杭州與時賢往來共推吳子尺鳧爲藝壇之宗嘗講學沈昭嗣園集諸方主客不設司錄而尺鳧以下坐論格物同異一時學者多稱之顧尺鳧好自秘日居深巷蒔花種竹足不越戶外而車轍常滿且有千里命駕留幸舍而數晨夕者以故流連文酒間嘯歌予汝積其所爲詩而久而成帙於以問世余思韻文雖細事顧時習升降輒成運會尺鳧自抒其所學不務爲趨逐而稟經酌雅動合古法昔所稱彬彬質有其文者斯詩有焉特世鮮實學即詞章出入亦徒恃誇飾爲一時標榜而尺鳧不然曾於

皇上南巡時獻迎

鑿賦頌而

聖心嘉之已

召對吳閭舟中使隨

駕北行而尺鳧以親老辭其不自矜炫而好恬退至於如此諸詩一斑則亦何足以概之康熙庚寅首冬月西河毛奇齡題於書留草堂時年八十有八

武林吳子葑園天下士也其才本非一詩之所可盡然名聞四海聲達九重而猶偃蹇諸生困頓場屋宜其感慨歌吟思託於詩以自鳴也戊子之春忽集其古今體詩屬余爲序余初以性兒久故諾之繼而讀其詩古體則發源於陶謝而濫觴於昌黎長吉今體則植根於王杜而蔓延於文房子厚氣骨才華無不力追古人雖世所稱新城詩派者未必過此世有真玉具眼自知何須銜以求售乎以此閣筆者久之己丑庚寅屢來責諾竟以病未及爲孟冬僕歸慙懃寄書惓惓以曲木可繩於直爲詞何其不自滿假一詩尚爾乎竊思從繩則直爲

曲木言也木原直矣何假於繩且不問繩之有無乎余
自有知識以來於授徒絕無講章於場屋絕無讀本於
理學文章書畫絕無宗旨家數派頭但知信胸直書問
其來歷則茫然張口也曲直姑置繩之則無云如之何
無已則盍請歌詩筆墨應酬圖之第三章曰忘記商周
三百篇宋唐晉魏定誰先老來只發隨時興譬若生當
邃古前今年病中則又云病當居易相同日年到朱熹
不敢望筆墨老因廉恥喪詩文化為古今忘蓋不師古
不拘今獨絃哀歌自道其情而已當其意得雖使周公
舐墨召伯揮豪要亦不以易吾一字也葑園而聞斯言

乎杭之介山寓昭山瀏不可作矣柳門馮子諒可共談
也康熙庚寅仲冬望前一日寒邨鄭梁序



葑園詩藁目錄 卷上

古體詩

古詩三十二首

南山石壁

自烏石峰下小汎

鷺鷥飛

滄浪作歌

春風

赭山觀海

夏集西堂

夜上五雲峰頂放歌

古別離

姚生二百四十家竹譜歌

園中老松樹

萬玉菴老梅

巡更夫

青蘿書屋堆假山篇



宣和御窰瓶歌

柴陞升移居西溪梅花深處

汪無亢讀書秋樹根圖

哭先大兄比部公七首

式園品硯圖

奇竹怪石圖

鳳形穴篇石臣兄還黃巖後却寄

送鄒念尊北上

馮錫三貽指頭書畫答以歌

美人牽虎圖為家靜友賦

林烈婦

姚參將

壽鄭寒邨太史

王百朋洗馬圖

贈裘殷玉

瓚符兄木石與居圖

憶年

行路難十五首

江城

訪金石農江上草堂二首

朱界洵明府雲山爛漫圖

答贈施自勗

江心鏡歌

佩刀歌

壺山草堂觀先叔父介菴公收藏歷代名畫卷冊

歌

采菱圖為項霜田題

梅花時偕家兄雪園泛舟至虎山橋夜宿

曉行至查山度七十二峰閣

暮至圓墓宿精舍 書王叔明畫冊

藥園詩藁卷上目錄

藥園古體詩

古詩三十二首

錢唐 吳焯 尺鳧

鳥無世鳳凰人無世聖賢立志橐天地弗受造物牽日月鏡萬方萬古光完全一晝而一夜所以常推遷人備四時氣與天相周旋山岳有立德江河藏靜淵修身以立命大道無頗偏天爵吾所貴窮達任自然至人通變化學易猶假年夜光豈自耀明膏寧久煎毋使荒歲月勉旃復勉旃

御馬在奚官調鷹在獵師收縱固有道飢飽會有時驅

風下長坂縱鬣不可追憑雲上霄漢飽颺不受維獵師
與奚官斂手仰天悲

齊王好吹竽濫者亦受恩嗟哉抱瑟人三年阻重閨所
好既已廣適足令智昏盈盈喜入耳搖搖蕩神魂安得
世間竽盡在王之門瑟固非所好竽或有時煩所好若
改茲請爲王陳言

斗柄既西指涼風動地起華月入中堂絡角河如水新
鴻方南翔故燕又北徙同有羽與翼中道訴悲喜涼暄
各趨途托身謀安止茫茫路岐間感彼東西士士豈不
懷鄉鄉人重金紫

釣師不慕鳥矰繳非所事弋人不求魚罔罟非所施山
豺殺河魚聞者嗤短智人苟向業定徒感鄙生餌名下
口常喧利傍刀已割不見孔雀毛焚身在金翠

奇肱造飛車一行七萬里顧茲穆天子八駿猶迤邐丈
夫飾儀衛登眺無時已頭欲摩穹蒼足可蹈海水不得
乘天鷄遊行終有俟

故人客長安遺我尺素書扣封披素書令我心神舒書
上何所述三年久離居書中何所述努力愛三餘書末
何所述兩友同簪裾前月降君命一譴一遷除譴者不
敢怨遷者多嘉譽聖明廣洞察燭龍銜珠如而我謬恩

私日直承明廬晨趨飲風霜暮歸驅跛驢敢惜筋力苦
無使君恩虛復書謝故人願言獨躊躇祝子據要津規
子毋包苴

客從遠方來遺我靈壽杖云是九真木奇巧不施匠質
貴名且佳摩挲向堂上我有堂上親親年八十逾喜得
扶持力拄杖捋髭須髭須雪在手兒能出門否

五六月不雨河流斷南北河底哭衆魚生死在頃刻魚
汝且勿哭下有神龍國龍乃汝之長顧汝亦動色縱弗
爲汝謀霖雨是其職

婁婁青蘿葉粟粟青蘿花花小故細瑣葉大偏周遮蜂
鍼苦鑽刺蟲網競紛拏開落人不知雨露闕光華
拱把梧桐樹三年已森森書堂三兩間伏暑晝陰沉微
風生樹頭濯濯披疎襟不來鳳皇棲枝小非所任曾聞
霧中山名工斲爲琴又聞爨下材聞者傷其心保護勿
剪伐千載含清音

見金不有躬金乃非其有獨怪抱玉士懷寶東西走三
泣還荆山赤虹終不剖至今千載下譏評隨衆口

四座歌旣闌賤子歌獨苦酒杯一失歡白刃血如縷須
髯若戟張耳目皆芒主使氣凌丘山翻手作雲雨猜忌
轉相仍餘波逮門戶牙蘂初生時渾忘入怨府離心而

賢首賢者膺常拊東海有餓蛟西山有渴虎水陸本殊途相逢亦爭怒

一日復一日東烏日西傾况茲值蕭辰風聲鳴金錚天地既已革草木空有情盛年不可留兀坐搖心旌金神驅炎去玉管催寒過安得穆穆春常時暖且和嚴霜怨李陵悲風慘荆軻古之傷心人激楚商聲多我心自愉悅請歌南薰歌

清水魚兒鮮濁水魚兒肥義不遊濁水志士恒受飢節苦心自甘守是不慮非西山亦周土夷叔胡餐薇三閭放江潭甘蒙漁父譏

君子性如玉温栗不可媒小人顏如酒一見便懽悅縱無千日好且得暫時熱君心已如醉我請以酒譬當其五齊成釀熟糟先棄書作座右銘惟酒最無義

讀破書一屋橫氣塞霄壤視此一寸衷俯仰羅萬象酬酢古之人與世少還往山水動奇趣煙霞變靈想文章本樂事所樂在心賞豈無平生歡立意絕標榜緬懷遷邕輩淪落同榛莽不容軀七尺難滅光萬丈區區語言間千古留英爽

蛟龍藏深淵志干雲霄上大志貴潛行肯為時輩仰朱鳥何繽紛失足投羅網奇氣善收拾英雄豈鹵莽

清江采芙蓉，歌泛明月秋色。上銀塘芳華一齊歇，芳華能幾時零落。傷紅衣回風吹不去，故逐鴛鴦飛。月光津樹頭，衆動一時闐。細影橫素牕，無此好畫壁。微風一搜索，枝葉如可摘。輕持鷺羽扇，淨拭龍須席。濯魄在冰壺，怡然得休適。

我有夜光珠，來自東海東。明月耀御名陰光彩，無乃同托生。東海濱吐氣翳高虹，繫之羅帳角私照。一室中願得青鸞鳥，銜珠還龍宮。海水忽騰溢，月光轉迷濛。

長安有丁緩，造扇動七輪。宋人琢玉楮，其僞能亂真。以巧食一國，世口常津津。淫巧蕩人心，聖人垂爲箴。

秋氣入叢木，落葉從風颺。天地本無聲，觸物成金商。嗟哉綺紈子，歡樂殊未央。春園盛桃李，煜熠粲花光。堂下理瑤瑟，堂上羅瓊觴。黃金銜馬勒，白玉駕鷹牀。變童紅袴褶，妖姬繡下裳。勢利浮雲行，有時會飛揚。放志如奔車，况乃升太行。委轡不自慮，觀者心徬徨。

中流有失船，中道有銜檠。萬譽不上顏，衆毀竟銷骨。君子戒釜鼓，言行胡可忽。言行動天地，願慎樞機發。

青青女貞木，萋萋倚堂廡。亭亭凌雪霜，鬱鬱歷寒暑。一朝摧狂風，根拔猶負土。劃地碾雷車，彌天斫電斧。虛秉少陰精，倏爲造化苦。燥葉委茶鐺，焦柯供飯脯。弱柳植

牆隅秀色一何嫵
物理有變更榮悴非自主

墻東有閒園
日夕常去就
平時愛幽獨
近復少朋舊
灌園植嘉蔬
雨餘理鉋鋤
秋來風味佳
碧椀盛青豆
平生不解飲
晚飯一尊侑
夕陽留餘光
明月回白晝
微風穿疎林
吹上輕衫溜
曠地墜銀河
波瀾如不收
雲羅織天衣
星斗粲組繡
靜觀發清機
俯仰安載覆
孤懽心自賞
所享寧不厚
龍漢遺劫灰
妄窺天地壽

一魚入船艙
衆魚扣舷訊
漁人非仁者
貪餌胡弗慎
江湖多神魚
風濤興一瞬
女無覆舟力
鱗鬚徒爾振

啁啾鳥雀羣
辛苦原上飛
意南而意北
訾食身不肥
春華托春風
那知秋霜霏
鴻飛入層雲
弋人抱矢歸
天命如可制
人心無時違

丹桂浥露漬
黃菊迎霜摘
交河萬里外
鴻鴈已來客
江濱蘆荻花
一夜風吹白

古人重結交所貴
結以真河山
渺千里塞默通
精神灼灼桃李花
家家有陽春
麟鳳非不異
不爲俎上珍
雌雄一雙劍
千載甘沉淪
一朝拂拭出
各自混風塵
精靈本相合
龍化延平津

江籬滿江濱
江水日夜深
江水深見底
故人同此心
水之精爲月
遇秋氣凝金
造化亦感激
人生胡商參
願爲

朱絲絃繫君綠綺琴一彈別鶴操再彈孤鴻吟晨露啓
微寒浮雲結重陰恨無銅鐵轡蹉跎空至今

南山石壁

褰衣直上南高峰嶽寄石級升千重曉嵐消盡日卓午
晴光面面開芙蓉道逢老僧話勝境挈予共度風篁嶺
絕巖陡轉圍茅菴當門轟轟橫如屏竹浪松濤斷復連
耳驚驟雨飛晴天宿雲忽裂古木突危石欲墮交藤穿
雲間騷客昔過訪筆墨淋漓崖壁上石壁刊董尚書陳徵君詩噴坑虧日
閉蒼煙荒苔一片青青長淒涼僧舍北風寒負墻古佛
金摧殘只有青山不改舊雲霞駘蕩生奇觀

自烏石峰下小汎

山閣罷僧茶松徑盡徐步賒酤喚舟師一葉隨去住亂
雲橫斷山殘陽隱古樹颯颯涼風來浩歌起白鷺

鷺鷥飛

雙鷺鷥飛相追上鳴雄下鳴雌翅毛水浸雪頭頂風吹
絲一飛復一鳴常在水之渚忽聞前洲欸乃曲齊上雲
霄鳴斷續鷺鷥飛何太促君不見王孫挾彈規黃鵠

滄浪作歌

幾度尋滄浪滄浪秋水綠波平開明鑑流方隱沈玉遊
魚多往來浮鷗少拘束愛此滄浪水願結滄浪屋不見

滄浪人但歌滄浪曲

春風

春風一夜桃花落春人都道春風惡春風無日不花飛
偏爾桃花氣力微遣語春風且休歇留得桃花過三月

赭山觀海

天地無窮際四隅開決漭萬派匯東南溟漲共一廣浩
浩宅天吳隱隱潛罔象日月互吐吞潮汐迭消長雙峰
鍊羅刹一檻亘千丈江海從此隔浮沉分禋享其性胡
叵測飛滂忽騰上太古石不堅崩崖恣漂蕩無勞秦皇
鞭西山向東往天輪已激翻地軸亦擾攘煙火積萬家

吁嗟無寸壤殘宇八九家籬雜榛莽居人面黧黑行
止俱惘惘漁舫逐微利洪濤鼓雙槳謀生託海濱安能
復疇曩我悲滄桑改揚塵意其儻神仙傳可稽蓬萊結
遐想

夏集西堂

逃暑欲何之西堂會佳客密林無炎蒸軒窓四面闢碧
盃泛蓮花調冰奉觴醪俄看駛雨飛迅雷驚裂帛奇峰
亘山帶一痕露天碧日馭暗經西火雲斂其赤奄奄入
落棠光景何逼迫東頭飛玉鏡團欒光潤澤星淡天低
河燈明不盈尺攬衣入我懷天路未爲隔散步下庭除

顧影共憐惜人生總百年如過白駒隙能有幾歡場况
當三五夕林屋空遺思河朔但陳迹無辭醉沉冥月沒
東方白

夜上五雲峰頂放歌

五雲峰插天碧上有珍珠之泉芙蓉之石山鬼啼煙陰
竹裂精靈古洞收月魄傲睨一氣充青冥蘿花石室談
名御經天風冷然吹客夢銀河爲帶衣華星伊昔神仙子
服食瓊瑤丹弱水三千里瓊樓十二闌身騎白鳳凰從
風振羽翰日月忽若馳伸手駐雙丸

古別離

萬里動商風攬衣中夜起落落視晨星脈脈情何已離
杯猶在手顏色無歡喜誰能歌苦調腸斷江流水江水
去悠悠故人不可留

姚生二百四十家竹譜歌

姚生竹譜凡二百四十餘家止於明夏杲自雷公始世
本稱史皇作畫姚生竹譜信有之與生名載鶴字雪舟
余同里人同輯者侯官楊彬信豐李迪

姚生好古世未有譜竹直溯黃農時龍拏鳳戛各種類
一一幻出凌霄姿東絹如雪徑一尺烟雲風雨生枝枝
學畫學得草顛法手提頭髮濡墨池不節而成竟直上

無根之勢還倒披造物變態有生意今各以意自得之
我嗟儒生生也晚古學振振紛言辭竹書汲冢未或信
漆書孔壁猶爭疑千搜萬索竭知力事迹嚴秘神鬼欺
誰言丹青爲小道神物呵護無凌夷秦火燔書不燔畫
精靈豈爲姚生遺十五學畫今五十終年脈脈凝神思
心血焦燥莫誰憫蒼浪短鬢垂如絲三十餘年輯成譜
二百四幅真離奇宣和若見亦矜惜何況齷齪凡畫師
姚生昔爲四方士逸志擺脫黃金羈隻身東走一萬里
蠻荒瘴癘常趨馳胸中成竹不可狀或歌或哭成狂癡
祇今故園斂足迹孤介詎肯求人知囊無銅錢給升斗

獨把竹譜忘朝飢琅玕不作天府貢姚生姚生空爾爲
園中老松樹

園中老松樹歷年已千百上柯生龍鱗下根結虎魄憶
昔十年前主人卜新宅偶移凌霄藤樹之樹之隙嫋嫋
力難支不盈六七尺經秋復經春雨露恩轉劇一本麗
其體分條漸紬繹竟爾踞高顛垂頭颺空碧四月一著
花十月尚堪摘最是夕陽時明霞半天赤東陵近海隅
沙土苦鹹瀉僕累不爲功御名冥偏降澤藤因託樹生樹
乃懼藤危樹死藤不知童童儼如昔一朝風雨狂電掣
雷火射枯幹忽崩摧繁紅亦狼藉無復凌雲勢同臥堦

前石殘花猶見憐老樹誰與惜草蔓誠難圖物理本易
格歎息謝主人古人重三益

萬玉菴老梅

老梅在長興西山萬玉菴蘇文忠公守郡時曾遊賞焉
康熙初家菌次先生牧吳興按志得之環以石闌勒碑
紀其事余來遊值花放時因而作歌

老梅年老蹤迹闕不上撐天翻入地空山無人泥土封
精靈欲化爲蒼龍鱗作之而撥爾怒夜半鞭雷走風雨
千年骨骨如鐵一日花花似雪幸不生向東海傍截爲
大禹寢殿梁

巡更夫

里中巡更夫善事母母老且病乞吾友姚雪舟爲紀容
余聞而有感焉作巡更夫

巡更夫巡更夫家有老母寒無襦十年敗絮脫衣母寒
風刺骨行街衢犬聲狺雞聲惡金吾不來猶擊柝解一母

年七十骨枯形毀豐年乞米半雜糠粃寧甘噎傷勿爲
餓死解二徬徨立道左道左逢畫師伏道告畫師小人有

母敢求繪筆記容以爲遺解三笑走東鄰小孺哭倒西鄰

老嫗孺子癡騃不足論老嫗今年喪子子又無孫解四慈

烏慈烏昔爲乳哺烏今爲反哺烏翳爾畫師可能畫出

慈烏反哺圖

解五

我聞古昔接子有道弧懸於門梧柳棘

棗

解六

官人求官多遠謀商人求金多遠遊求官願等公

侯求金願比山丘

解七

歌嗚嗚中夜太息胡爲乎不聞門

外巡更夫

解八

青蘿書屋堆假山篇

香山憶東林少陵愛西閣非云見識偏騷人耽寂寞余
慕五嶽遊未得窮芒屨書生守田園披圖空抃躍何況
宅市塵車馬日相索時尋淥水居枉負青山郭墻東有
隙地昨歲新開拓舊畦除棘開短茅翦樹縛堂成僅尋
丈結構從簡略天光入室多風來那能却安溪產黃石

文理殊不惡陡然發高興何惜解囊橐一朝集百夫牽
挽力猶弱毀垣復壞屋相顧盡驚愕一一勢嶙峋疑把
芙蓉削三日堆一丘五日聚一壑壑底折爲潭澗泓泓水
一勺煙雲忽宛然山水竟儼若是時霜初降草木未黃
落花匠不礙寒謂可施錢鏹近水插芙蓉依山種芍藥
竹翠戛琅玕藤絲裊瓔珞辛夷頽若翁古梅瘦於鶴隔
墻樹陰森一望絕寥廓主人憇其中偃仰欣有託良友
時過從指點恣歡噓韭新菜甲肥滋味愛淡泊釀熟出
新筍盡醉鷓鴣杓北風鳴夜雨寒威方肆虐初見雨疎
疎漸聞雪霍霍松紋密亞窗水凍重垂幕高枕圖安便

此身無網絡轉傲五陵豪光耀徒熏灼所以達士懷浮
雲無住著余豈厭膏粱亦非志藜藿芙蓉不作花蕭條
類蒲弱鴻鵠不高飛譏評隨燕雀吾與造物遊天人鮮
愧怍

宣和御窰瓶歌

宣和御窰瓶其制彷彿漢雙鹿壺藏新安戴氏蓋三世矣
天啓間時貴購獻魏璫力索不與遂以他事中之會璫
敗始免其家至今猶寶焉黃山黃翁見而述其事請余
作歌

上世帝王辦民器百工居肆成其事金分六齊古制存

雙鹿之壺從漢始宣和天子博物人命工摩仿爲埏埴
按古圖牒造作精攻金那許誇神異玉質如縈豔雪光
花文似罩靈禽翠黃封持獻御榻前中貴不敢尋常視
流落經今七百年清商夜抱泣荒煙土脈幻成草木狀
水氣纏結蛟龍涎神物從來不易致直價何止十萬錢
君家先公善鑒識朝夕盤旋供座側祇覺曾青淡無光
翻笑文皮闇無色斷紋宋甌韜奇彩刺雲蜀錦加文飾
瓶之美好良足珍桃花李花三月春汲泉拂拭烏皮几
名花古器相鮮新從來名世皆幻世造物秘藏疑鬼神
聞昔鄭州名獨擅不惜千金買一片汝官哥定互稱雄

即今零落風塵徧近代堆花鬼國工大食佛郎吾亦賤
爭如御府陶旒奇光華猶帶含香殿偶來耆舊年八十
雙手摩挲深眷戀回頭老淚忽沾衣爲說先朝曾一見
當時權貴恣搜索此物幾備中官選匹夫懷寶不可奪
韞匱足徵孫子善誰言萬物無太常浮世繁華掣雷電
四座聞之盡愴然斜日寒林罷歡宴

柴陞升移居西溪梅花深處

秦亭山西更西去西溪梅花名獨著柴君卜宅爲梅花
且在梅花最深處冥濛竹木隱柴扉水鶴沙禽作隊飛
滄洲煙液荒徑絕一條略約橫苔磯人傳此間如太古

世家家樂安土惟君名士非隱淪豈愛漁樵共爲伍
從此盈盈水一方莞牆蓬室竹方牀桐絲常帶澤雨潤
書卷時染溪雲光南飛雁盡迎寒候葉滿空山畫新就
莫嫌風味太酸涼須知人共梅花瘦我欲從君醉酒卮
還期十日春風時春風留客不教返無煩驛使貽相思
却憶今秋曾問渡微茫秋雪迷津路野水連天不見人
那知君到溪邊住

汪無亢讀書秋樹根圖

高志何疎狂孤懷任容與手中一卷書影落菰雲漱吾
願老此間君欲歸何所不聞風蕭蕭秋聲淡如許

哭先大兄比部公七首

天胡生日月地胡生山川山川斂精魄日月促歲年兄
弟本同氣實乃天作緣一隨萬化盡骨月無完全不知
死者苦又為生者憐生者空痛悼死者竟長眠

願得生為鳥為鳥為脊令願得生為木為木為紫荆急
難自相顧原上飛且鳴西枝既憔悴東枝亦不榮動植
本至理無心尚有情人生胡弗如不能隨死生

秋聲入叢木庭空白日冷絲絲二六時晝長夜尤永密
室燈光青枕席弔形影牀頭圍子婦聲與息俱屏咳嗽
漸微微起視不復省鬼伯已在門永訣在俄頃出戶仰

天歎秋河垂耿耿

長夜闌無聲呼兒聽一言早歲離家塾奉祖在林園四
序看花木朝夕問寒暄父兮與叔兮還往不憚煩汝祖
今已耄我死失晨昏汝今代我職勤懇侍寢門音微漸
不聞四壁淚潺湲

四壁淚潺湲憂心獨如擣顧茲永別離言語殊草草目
定光不搖形神在虛表我有情萬千何由向兄道

憶昔年三十秉鐸初委摯

先兄初授瑞安廣文
內轉國子監學正

離家十七年辛

苦勞王事為田復為李

由農部司務今
官比部主事

輦下稱能吏性本

愛煙霞不肯徇勢利乞假省親還

壬申年十月以省
親子假還籍

投簪如棄

履小圃近墻東

先兄闢新圃於葑園之東仍金園故址

松竹交蒼翠門前羅鳥雀

道口絕車騎一室坐觀心若與枯禪類行年五十八不

知老將至偶爲霜露侵一病竟蕉萃

魂升魄旣降遊氣無復入轉眼隔幽明人鬼此呼吸音
容猶在堂冠履不能執馨香猶在尊酒漿不能挹傷心
白髮親淚灑衣裳濕西河千古痛寧知一朝及皇天胡
不聞聞之亦應泣

式園品硯圖

成生燥髮即善書研煤敷紙無時虛成生善書復善畫
搖雲拂雨恣揮灑學書不肯學張顛學畫不肯學黃荃

半生精力不辭倦眼看老硯磨將穿傳聞造作始仲氏
數傳弘農貴無比從此詞家愛石交頭華目眇誇長技
那知天意欲磨人特產異材供作珍竄窅洞壑莫能閉
醞釀雲霧如有神端州品格稱上選蒙茸艸色紋金線
馳基龍尾鳩鵠眼散落人間繁且徧祇因有力競收藏
無緣不許尋常見近代好事益鬪奇故宮殘瓦充爲硯
吾於摹搨如童蒙安想點筆生長風翻然自悔思學劒
欲恣不得心忡忡成生落魄負奇癖朝夕品題手不釋
石臺陰陰露精彩池波溶溶含潤澤我有一硯猶嬾磨
笑君一一勤搜羅今朝見畫忽生妒周遭環列何其多

天將磨人爾奈何

奇竹怪石圖

葛水龍并州馬翻飛直上霄
霓野零陵燕昆明鯨崩騰
欲挾風雷行竹石變化多
靈異畫師奪得天工意
霜節丫叉撥雨開雲根
飄忽扶風墜君不聞
懈谷之石能吸日月精
上有孤竹稜稜生截作玉筒
吹太清宛如三十六聲丹
鳳相和鳴寥寥世人誰得知
奚怪紛紛嗤畫師鳳形穴
篇石臣兄還黃巖後却寄

余先世居歙西之黃巖數傳而降
漸去其鄉一遷杭州仕義公後
是爲吾族一遷泰州爲石臣兄
族乃仕善公

後也二公墓名鳳形穴並在黃巖
昨歲康熙甲申冬忽有人營葬
其傍僅隔咫尺已而墓碑毀墓
木亦漸侵伐移書告泰州之族
今年春石臣來相約還黃巖會
上南狩余獻詩奉命赴吳門
行在不獲同拜祖墓心竊愧焉
因作鳳形穴篇以寄同還者
從祖元澈叔晉裴兄快亭

吾先墓在黃巖麓淑靈之氣旋坤軸
山交水會成鳳形雄上高飛雌下伏
鬱岬堂坊峙此間芬澤松楸儼如沐
元季經今四百春變遷幸不隨陵谷
先人名德有餘清聚族而居世不更
那能故土常安堵不出鄉閭非世情

吾宗散居浙水上君家遠在海陵城相見無緣千里隔
相思有恨一江橫大似晨星徒落落豈如谷鳥共嚶嚶
去年甲申冬之月新阡咫尺來何猝葬師誰遣牛眠破
律法難容龍脈掘豐碑屹立既傾頽古木周遭又侵伐
微聞豪右所從來乃自子孫先竊發傷哉人不生空桑
胆裂魂驚豎豪髮移書不惜路迢遙感君千里來輕橈
危同巖罅將崩石怒似江頭欲上潮差有人心寧默默
可堪大口尚囁囁如君卓犖真奇士懷中四月嚴親死
母也賢聲孟母同叔兮古道興宗似又山叔落筆俄驚吐玉
才彎弧更挾穿楊技烟花烟月古揚州森芒不逐風披
邊家山隔越空飛夢一寄黃巖鳳穴篇

送鄒念尊北上

念尊名弘志烏程貢生少隨父官遂安廣文康熙甲寅
歲閩逆亂賊兵猝至城下守土者悉竄廣文獨嬰城拒
守糧且盡遣弘志告急鄰郡夜縋城下墮折雙齒會

王師至圍解格於兵政不得受軍賞終以廣文歸老後
辛巳癸未 上一再辛浙江弘志以父前事上陳且繪
圖以獻乙酉四月復獻詩 行在 上命翰林掌院試

詩於蘇州學宮拔士五十人弘志與焉旋頒帑金以資
其行余因作歌送之廣文諱儒領甲午鄉薦世居震澤
東山

前年曾記菖蒲綠與君相見碧湖曲今年正值櫻桃鮮
與君相逢紅日邊相逢不語看着字雲氣英英天尺五
六龍歸後各東西傳說君名動紫府知君笠澤一書生
少年殺賊何縱橫火瓠冰柳計已盡乞師夜半縋孤城
父也微員不畏死子甘墮折雙牙齒論功昔僅賞師臣
繪圖今得陳 天子天子披圖意惻然幾回奏對 御
舟前承恩更進神州賦喜覩青天撥雲霧忠心一旦慰

重泉孝思千載叨奇遇君今獨向長安道到時却共秋
光到北路寒生赭白驕仰天一鳴風蕭蕭九苞文彩層
霄上鳳凰豈受雕籠養平生遭際在 至尊自不與時
為俯仰君酌酒我放歌人生快意能幾何黃金臺畔車
馬客幾見捉筆還援戈聽我歌勸君酒浙水燕山乍分
手爾汝何愁相見難別離休悵東風柳

馮錫三貽指頭書畫答以歌

古人用筆假焉耳一畫初開不在此須知妙會本一心
心能使臂臂使指指頭醮墨亦飽酣作書與畫神化舍
本朝獨數高僉事謂高公且園何意復有馮錫三張君書畫茅

次下恍若珊瑚光照夜墨花散處感螺文使彼龍須友
減價君不見張顛磨墨濡以頭章草蜿蜒龍蛇遊又不
見王墨手捫還足踏潑墨山水隨形合天地變化新復
新今人便捷過古人

美人牽虎圖爲家靜友賦

天迷地密野色蒼空山草棘紛刃鋸猛虎腦猛牙須張
怒踏抉石如簸糠掉尾鞭樹如刈蔞虓然作聲風洋洋
何來美人岐路傍蛟龍髓敷琢玉妝繁星纓珞明月璫
衣披白雲霓曳裳舉步直欲排九閭迴顧茲獸搯其吭
纖纖手挽紅絲韁妥尾帖耳行踉蹌白石墮地乙字藏

樞星不明沉晶光爰稽古籍費忖量飼以生餌有梁鴛
搏以一手有中黃彼皆奇士非女郎女郎似此寧尋常
千古何獨稱楊香吾家季子錦繡腸摧斑拉駁勢莫當
詩虎名與羅鄴方倩誰作畫閩陳綱邈齷之虎堪頡頏
觀者慎勿嗤荒唐女媧誅龍渡海陽婉羅曳鳳升金堂
大抵造物柔制剛英雄托足須隄防虎哉虎哉無自傷

林烈婦

里中烈婦曾歸林生邦基十年生以母亡哀毀死烈婦
誓不獨生投繯家人救免舅聞於仁和縣令謝公儼公
勸其立嗣奉舅以代子職越三年舅卒旣葬遂絕食凡

十有四日坐而瞑時康熙丙戌秋七月二十日也

東運河邊水紋碧望海樓頭雲氣白詩詞四壁競鋪張

冠蓋單門紛絡繹林家有婦女中師殉夫死節甘如飴

旬有四日絕粒死秋暑不改生容儀陰飈灑灑動帷幕

孤魄沉沉墜香閣一心儼似冰雪清半生詎比芝蘭弱

昔為嬌女日夜藏父母珍珠掌上光七歲拈針能刺繡

十齡搖筆便成章舅氏摧關曾奉使烈婦父福建人母高進士高龍光女弟龍光推南關

烈婦父母依焉是時烈婦生杭州叔父琴堂又筮仕烈婦叔曾駒令無錫迎焉生自錢湖長錫

山因依未便歸鄉里那知生也命不辰零丁相繼失雙

親淚濕蕙花空隕雨心傷枯樹不逢春既讀詩書明大

義紅顏肯向春風媚踰笄而嫁拂朱絃百年琴瑟從茲

始良人秀弱自儒流垂老翁姑雙白頭清晨提甕先臨

井中夜鳴梭未上樓樓頭壁月清光徹樓外瓊花香霧

結花枝零落復傾摧月影朦朧又殘缺傷心慈母失音

容哀毀惟知地下從安福曾傳晉符表永嘉猶志宋陳

宗浮世風輪隨夢幻斷腸聲咽猶含盼同為水面雙飛

鳧散作天邊失羣雁酸風射隙碎孤燈手持白練絞作

繩引決兩頤寒似鐵救回五體僵如冰明日榮旌已下

縣幾度陳詞心不變代夫奉舅義莫辭立後承祧事尤
善可憐跳脫雙文螭隨行忍使傷參差可憐步搖九威

鳳雄飛獨自留單雌無復爲容謝膏沐不媿餘生兼事
育自憐半死龍門桐誰惜孤生泰山竹瞬息三年淚未
乾一朝舅死葬初安漆燈有光看隱隱靈衣欲動聞珊
珊是爲戌年秋之孟願矢貞操成潔行依然色笑勸鳧
茨夢中猶却翁姑命烈婦不食時夢舅姑出
學齋勸食再四却之從知烈婦志難移
何須更挂東南枝五日不食目漸瞑十日不食聲如絲
起把筆牀猶攬涕題詩祇述從夫壻壓衣重珮雕玉璫
橫簪更拾流銀髻命奠新篋酒一觴雞鳴兀坐整嚴妝
泠泠止水禪心寂烈烈英風俠骨香巍然大節頽波起
采詩太史今誰是請看列女幾人同千古紅顏在青史

姚參將

公諱來仁和人隨父鎮廣東以戰功授惠州參將泰昌
即位之秋山賊入寇公慷慨誓師孤軍直抵賊砦竟戰
歿州民屢見公現形迹其尸得於林莽間奉勅立祠歲
祀焉今康熙丙戌歲同里諸生請於學使者從祀郡鄉
賢閣學西寧盧先生琦敘傳其事

我聞惠州姚參戎身長八尺膽氣雄金羽飄發沒寢石
星鎚上下追迴風壯歲輕裘度百越阿父高勲動雙闕
陣上唳咤風雲生窟中簸蕩龍蛇沒練師時載蜺旌行
射獵常聞鐵甲鳴應是伏波加上爵復令橫海授專城

萬里巖疆歸甸服百辟紆籌減軍斛誰使奸渠探赤丸
徒傳羽檄來青犢漢室何年服尉佗萑蒲羣嘯起干戈
忽教幕下投壺樂都入車前變徵歌夜半椎牛宴征士
崇朝伐鼓拔營壘平生不肯負朝廷此際何容戀妻子
白日黃塵蔽莽林風飛雲慘晝陰沉山當炎海蒙烟瘴
水出瀘溪遇毒淫殺氣憑凌上霄漢將星夜落崩弦彈
後騎不繼如兔逃前軍已覆皆魚爛三尺昆吾血氣腥
狂呼賈勇斫不停陰風吹沙飛利箭燐火帶雨飄繁星
鼓聲已絕戰聲歇一死誰知臣力竭仰天怒馬嘶朔風
臥地金鎗射明月撐距橫尸舊戰場烏鳶鼓翅下穹蒼

常留精爽化猿鶴不許平虛犯虎狼軍容歿後猶森挺
英雄堪與常山並石埭山刊墮淚碑博羅城鑄銘功鼎
故園有子隔烽煙傷心馬革裹尸還忠魂縹緲七千里
老淚縱橫八十年公子炯若年九十矣歎息當時戎馬徧天心早定滄
桑變誓師慷慨能幾人判向沙場死征戰

壽鄭寒邨太史

康熙丙戌嘉平之五日寒邨先生長年七十齊春秋珊
瑚座上香雲結玉山三獻羅觥籌笑彼東方小兒金門
空玩世西母玉桃三熟徒三偷龍漢一運九萬九千九
百九十九劫氣先生之壽一往與之侔不必訪洪厓不

必渡環洲天生文人鍾靈毓秀一間出俾以考明索幽
上下往復追冥搜風為繪雲為鏤匣以明月虹玉燭銀
之寶室餐以朝陽瓊漿玉液之風甌特授七寸青鏤管
現出五色光華道四庫二酉任盤踞冥冥肅肅神與游
粲然其文德義禮仁信飛鳴即都俯瞰燕雀徒啁啾入
為三館史出作五馬侯燕山粵嶠去來萬餘里有如天
星迴環纔一周束身勇退返巖谷轉笑日月行揭不如
處陰息景時休休尚欲窮神達變化夢生八翼直上天
門左翼忽折飄墮風颺颺先生真手自不壞真剛寧化
繞指柔半生亭子方圓不踰丈偃仰圓穹完塊同虛舟

匹如張乖厓請分希夷華山之半供遨遊又如李若水
嬾殘半芋領取十年宰相歸林丘應笑論事習鑿齒乃
以半人赴徵求休文手握臂請儀求秩不自由袁豕何
足論劉遴肯與儔先生真全人與物無戈矛有時捆載
魏州圖書之半乘有時剪取吳淞半江之清流嶧陽孤
桐高百尺半枝不畏霜雪稠白雉山前榮枯交讓樹千
霜萬霜遇陽赫赫陰颺颺先生乃喬柯東風牽扶留有
子更傑士瑟珠與蒼瑤兒駒依老驥一瞬奔騰萬里追
駒騮有約拜龐公牀下衣願摳引領四明山峰拔萃挺
霄漢常有萋萋鬱鬱雲氣占斷東海頭將進酒羽觴浮

長筵四座陳名謳忽有狂歌突出瀾翻舌敢博先生掉
頭一握炯兩眸

王百朋洗馬圖

我聞房星精散在渥洼水口中色如日月光墮地即能
走千里走千里君莫猜今人不築黃金臺千年駿骨猶
作銅聲響况是追風躡影天上來古來志士亦如此相
士弗如相馬耳神駿之性非易馴那能免得行風塵王
生才卓犖手中握筆同握稍稜稜獨抱倣儻志誰是寒
風誰伯樂翛然持寫鐵衣騶沙空顧影沉中流輕爬短
刷脂膩浮跳珠萬點魚目愁三花五花偃復起零亂濕

雲春不收勢欲驕騰頭怒側旋風一團色如墨如何舍
却黃鬢奴故遣兒童制龍翼吁嗟乎世人相馬皆肉相
斗豆束芻空喂養王生寓意豈尋常即此披圖亦神王
君不見天閑十二馬萬匹萬馬受羈一馬逸一馬逸今
當君前請君飾以黃金鞵翻身高著珊瑚鞭

贈裘殷玉

裘丈頭顱已如雪裘丈豪氣如少年一生汎覽書萬卷
几木研石俱磨穿橫山之集一尺厚玉虎鳴兮金蛇走
墨花點點歎珠璣空夢錦衣貼月飛洞庭東山志一統
天子知名亦何用祇今海內數才子作者如丈誰與

比向有東海公手持白玉尺天下仰龍坂丈獨爲上客
推之敦珠盤奉之重拱壁天球大貝出世珍胡爲掩抑
於風塵古色雖陸離不敵凡金銀世事浮雲倏變幻隻
手欲補天衣綻湖海歸來一長歎衡茅幸不炊煙斷橫
山遙接泥橫山慈溪江水流潺湲有婦挽鹿車有子扶
籃輿登山復臨水何妨常晏如獨不見西溟先生居同
里暮年壯心猶不已桂花奪得銀宮裏

瓚符兄木石與居圖

君不見東莞有木名虬松倚天天矯成蒼龍君不見熊
渠射石沒金羽驀地迷離疑伏虎世間神物有如此造

物蹤迹多奇詭誰言木石空頑形深山大澤藏宵冥神
鬼呵護出光怪日月摩盪生精靈我嗟世儒眼如豆七
尺空爲天地囿安得翻日車親至若木東手鍊五色石
補天天無功不然持斧伐樹銀青宮不然揚鞭驅石青
海中叱咤石羊跨木鳳造化原爲小兒弄笑彼移山兀
自愚况爾擇木小智徒區區吾兄才大出塵表不比齷
齷凡世儒英爽逼喬嶽矯健凌天衢詞賦追屈宋理學
參程朱著作已等身手編不論尺名御闕一室中紅光射
奎壁行年五十仍短褐中間坎壈遭百折書生肝膽爲
誰用蒼浪頭鬢先飛雪祇今豪氣猶昂藏寶刀鏽澀中

有銚與石同犖确與木同老蒼山轟轟水浪浪北斗挂
影雲留光蕭然獨與木石友木石逢君亦非偶自識欽
寄磊落才須知慘淡經營久黃石公蒼顏叟支離盤伏
居左右煙雲影裏幻靈機風雨聲中動吟吼萬疊波濤
頭上飛千尺蛟龍脚下走掀髯一笑天宇肅如此須省
豈巖谷瑣屑山鳥窺茶巾粟碎巖花落野服我忽披圖
記前事或者可入神異志葑園池邊老松樹紫煙突出
身蕉萃葉是金錢變鐵牙春風一發仍蒼翠前月東湖
百姓家疾雷下擊流紅霞巨石如盤色御名黝疑是天星
墜斗車我欲移此石置之松樹根居然兩神物木石難

比尊君意我未知我意君先得兄弟於人本同氣飛身
欲入君座側但令木石能容我不羨弘成吞之伏生食
與君作意相周旋堅心瘦骨同乃天一睡一醒一千年
醒來手把星辰摘自掃松毛煮白石

憶年

憶年十二三背書如瀉水以後五六年落筆滿十紙今
更十年餘捫腹猶空余六經我故交史漢我鄉里一別
會面稀出門同遠徙心高誇博覽望洋不見底手編動
盈尺簸揚半糠粃臨又窮校搜磊磊疊案几古人廓聞
見一物不知恥上而鑒日星下則識蟲豸吾性豈云鈍

目光寧足恃善得復善忘雲煙過彈指不如返初心醇
粹學經史毋爲狼性貪空傷馬加齒

行路難十五首

奉君五萬蒲葵之美扇四庫雲樹之錦牋一百二鐫鉅
鹿之綵纈二十六徽渥嶼之朱絃聽我一歌行路難免
君心曲無煩煎不見上規日與月自古代謝東西天春
蕙秋蓬有節候紛紛物化難爲堅不如行樂窮曠旭幾
人跨海從神仙紅顏暉暉易零落黃金難駐芳盛年
四座且勿喧聽我再歌行路難前有九疑山馬蹄車軸
不可攀安得馮夷大丙爲之御一登金靜室再涉銀露

壇人間九福限四域况欲舉翼升天關升天關虎豹守
勸君勿來犯饒口

長安巧工造巢車左右扶以十二輪一日一行三十舍
登山涉水無遭迤又有奇肱車一飛七萬里乘風東來
見天子遼海茫茫不得歸絕域何容誇巧技由來有德
四夷賓指南之車何其神古今大巧惟聖人

有劔首截北海蛟有弓血射南山虎手提二尺挽兩石
一時意氣逢生怒年來銷劔復歿弓恩仇回首茫無主
昨朝步出南山頭平沙草深綠於油輕裘一道飛驎騶
少年倚籍官千牛揚鞭側帽輕諸侯柴車辟易伏道側

舊隸漁陽人不識歸來探囊長歎息脫却羌裘償酒值
夜深使酒碎瓦甃風雨龍蛇動昏黑

華堂中夜火珠丹蓮花滴滴漏未殘前有洞房後曲室
鏤金錯綵圍雕闌中有美人來邯鄲清歌妙舞供幽歡
良人盛年早通籍夜夜承恩宿西掖富貴猶如錦上花
妾顏如花空浪擲蘭膏作樹不成叢自撫韶華增悼惜
君不見交廣有烏名孔雀倚天張羅貴生掠毛衣纏緹
非所惜金錢一閃無光爍我聞孔雀之尾世所珍孔雀
之血能殺人一身毛血愛惡別愛不加惡非天真嗚呼
愛不加惡非天真

種竹截竿作釣竿養蠶抽絲作釣絲朝朝溪邊坐磐石
一片水影青琉璃石底苔須細於線小魚如針去如箭
小魚如針去如箭笑君空有臨淵羨俄聞東海產巨鼈
腥風撲面驚崩濤收却竿絲還倚石此身未肯輕鴻毛
登山莫登郎當嶺涉水莫涉惶恐灘山危水險有窮盡
人情危險尤漫漫朝辭瓊瑤居暮走荆榛道青天起虹
蜺白日行虎豹黃金豔豔世所忌况爾英氣殊兀冪君
不見英雄末路難復難屠剪常與杯與盤灌夫使酒竇
嬰死那得生看族武安

朝聽鵲聲喜暮聽鴉聲愁人耳朝喜復暮愁鏡裏白雪

忽滿頭人生百年百春秋那能朝暮愁喜無時休灼灼
園上花芊芊道傍草同受東皇恩敷榮各自保人言愛
花不愛草愛憎隨人復何道馬蹄踏草草猶青穠花早
被東風掃

峨峨能耳山攬之可以十尺梯雄雄函谷關封之可以
一丸泥得失要害在方寸胡爲四顧之魂迷匹如浮海
老商舶金針一失迷東西萬物從來有定主冲天難以
鱗爲羽托足茫茫不自持十羊九牧終何補

君不見鳥中鷲鷹性剛決忽化爲鳩偏鈍拙棲止不離
蒿棘間朝啼暮啼聲切切昔時迴翔凡鳥畏今時抖擻

凡鳥啞昔時今時自不同英風一殺雄心滅冥觀物理
不可窮機智難違造化功東田錯認麟爲牯北海俄傳

蛇作龍

門前東西道欲去將安之下堂卽萬里胡爲泣路岐嗟
哉少年子罔罔成狂癡狂癡非性成學道路偶失匹之
曲木直以繩無端中道傷斧鑕君不見唐衢善哭陸雲
笑歌哭無情皆別調才人機智豈尋常故掃聲華溷屠

釣

書生讀書行迹苦齷齪行藏鄉里侮囊無銅錢給斗升
朝朝爨煙斷空馮三寸金錐剛且利常手把之刺兩股

學成上金門挾策干明主萬里銀河一線通夜深隱隱
聞天鼓氣色突兀爲多金更藉聲光盛門戶歸來焰勢
手可炙賓從雜沓如環堵旣爲生計治田園又爲追歡
買歌舞寄言鄉里莫驚猜昔時爲鼠今爲虎

推車何所之駕言出北門芳草何鬱鬱直接東南原原
上一古墓墓上古柏留枯根寶衣燒煙玉魚出荒榛惟
有羊虎蹲古碑斜臥不可讀風雨侵蝕莓苔痕名氏爵
里都漫滅不知誰代誰兒孫君不見東山太傅褒然異
直豎穹碑無一字不用文章炫後人自有勲名等天地
楚歌罷急此吳歆停曼音請君傾耳聽聽我歌終行路
吟拍笳擊筑多慷慨不若和鳴清角琴一彈再鼓歌南
薰我心夷坦無高深浮世榮枯何足道息心爲寶垂良
箴落落吟懷忘日月茫茫歌意憑誰尋

江城

江城月黑來悲風啞啞雁聲當天空青燈一穗朱旗閃
山鬼叫嘯深篁叢冷雨霏霏打窓罅飢鼠相銜上燈架
黃衣老人不復前枉自停眠過半夜

訪金石農江上草堂二首

海門潮白天光青城南步出沿江汀江上草堂翠竹裏
幽人懷抱清如水草堂之中何所娛清琴橫牀酒滿壺

一彈再鼓江月吐露水琤琤滴高樹
江風颭颭摧寒柯江水浩浩揚素波黃葉滿庭紛不掃
亂霞如綺鋪江草江草離離古復今遙遙懷古空沉吟
春來輦路蘼蕪綠南內粧樓何處尋

朱界洵明府雲山爛漫圖

青山幾千朶朶白雲飛天風吹不散迷漫成天衣仙
人擘作梨花絮不逐龍車駕雷馭回頭一握謝雲師何
事驅雲出山去

答贈施自勗

爲花須在簾爲月須在水照灼生光彩空明漾清泚詩
如好花月能者悟微旨靈心方寸間變幻千萬起星斗
羅胸中雲煙生腕底我把施君詩蓬茅遇蘭芷英英盡
菁華濯濯出泥滓如工就繩尺如軍堅壁壘江河嗟日
下流風徒靡靡君才方卓犖古音追正始此調久不彈
聞者心輒喜璧月與瑤花莫作尋常視

江心鏡歌

太名御陰精縮形影一寸晶光容可整幽宮掩閤幾何年
土花紺碧松紋冷傳來江上神人制背面依稀三兩字
項侯霜田貽我前致辭不言鎮惡午日宜造物洪鑪須善
變似此青銅經百鍊

佩刀歌

項侯既貽神人鏡繼復解贈戎王刃流金錯文嵌鑲脊
雙龍盤舞明須豪生犀截角作把手沙魚爲衣韜利口
西番剛銳東倭柔米息由來獨居首感君贈我意良厚
三公重器非虛授書生得此將安施聚集鄉鄰觀宰肉
壺山草堂觀先叔父介菴公收藏歷代名畫卷冊

歌

吳江楓冷朔雁翔兩月兩度來金閭抖擻寒衣氣瑟縮
疏窗短日留駒光草堂之中多雅設瓊函玉笈紛在傍
鵲爐奇古爇龍腦棊几拂拭鋪雲肪桓家一厨久緘閉

鄴侯萬籤隨低昂憶昔盛年大搜索豪取動破千金償
眸子炯如秋月鑿繭絲細拆犁鉞鋸垂老頭華手不倦
緘機謬僞恣品量我幸此遊殊不惡一望飽眼還撐腸
大卷引丈橫帛練小幘尺寸齊珪璋交州雪纊越溪紙
一一開陳聞古香江山雲霧起重疊人物草木都輝煌
名公大篇著跋尾學士薤書題左方華原營丘色澤古
後苑河陽歲月長顛老一山天偏側坡公四竹風披猖
江南一片真奇逸西蜀萬本驚擅場元朝四家各面目
藝園三品垂芬芳丹丘玉潭誰輩輩方壺雪谷何堂堂
成弘畫院還退舍繪事獨數吳中強源流分支別南北

臺閣定器追晉唐三百年中挾粉本前有白石後白陽
天池潑墨翻海水尚書搖筆凌文昌羣公衮衮那僕數
殘縑浣楮非尋常或經補綴牋素舊間遺姓氏審諦詳
漫說寒具驚點污細認縫印窺收藏僅披卷冊歷千百
更有苞裹滿石倉勤搜牢記窮曠旭天風飛雪催歸裘
一往決皆漸探頂胡爲縮脚嗟望洋我笑世人寡見識
口飫脂膩衣繡裳珠貝純囊韜瓌瑋金銀土窟沉光芒
縱然獺祭空罔罔未免鰕目徒俵俵張華流落機杼石
米芾蕭騷書畫航故物年深僅傳譜名墨星散聊名莊
鱗甲生成或飛動蝴蝶變化隨飄揚江湖豪翰元有數

幾見什襲千明璫吾兄矜貴手未觸有子修飾重裘潢

牧翁作
平聲

天機之精天帝寶母使六丁下取將稼軒蘭長青

湖曲壺公鯨遊白雲鄉令我一見一太息西望壟樹煙
草黃文采風流不泯沒子孫永保三千霜

采菱圖爲項霜田題

妾家大湖濱采菱太湖上湖邊風浪多安身逐風浪菱
刺利如針菱梗密如棘菱實不盈筐采采未肯息去年
水乾菱科稀今年雨多菱角肥雨多卑隲傷禾稼還家
那得充腸飢落日霞蒸垂柳岸衡茅一望炊煙斷提筐
轉向虹梁陌紫翠鮮新供估客估客連檣夜集多明妝

佐酒朱顏酡醉裏厭聽絲竹細吳音偏唱采菱歌

梅花時偕家兄雪園泛舟至虎山橋夜宿

挈舟胥江灣江流清且渙春來近三旬盎盎春氣散山
容翠欲滴花光明若粲疑雪垂玉屏如雲布素幔好風
飄衣裾冷香透鼻觀崖分橋影橫波轉萍紋亂野寺陰
喬木頽塔突孤岸森森接湖濬隱隱殘陽半去鳥飛一
線明霞碎千段隔舟笙歌起清唱弄珠貫細酌梨花春
香苗佐盤案東山忽頭白月湧銀盤爛空濛夜色清超
然豁靈贊雲洞路迢遙雪海光迷漫就枕已三更香風
吹夢斷

曉行至查山度七十二峰閣

天光不肯明殘月山路白蓬花墜寒露石滑少人迹日
華漸浮動花氣增色澤身入萬香國垂徧千林帛依山
布邨落剪林結花宅畦花若經菜爛漫開綺陌朶朶密
如攢枝枝不容隙紅英間綠萼輕盈二三尺高低爛霞
錦朝夕灌雲液不須庾嶺遊已作瓊臺客甘泉倚石烹
清觴隨地席山迴轉梅海冰花一片積風前時飄蕭動
衣春拍拍非雨墊郭巾穿雲蠟阮屐俄升最高岡晴湖
接天碧

暮至圓墓宿精舍

晴湖斜光斂幽谷晚煙起稠疊徑轉迂登頓情未已青
峰七十二都落芒鞋底花底陰翳山山外蒼茫水花光
融一片浮蕩山水裏石臺敞魚龍金庭錯錦綺長廊環
若螺涇湖直如矢憑高俯青冥游目歎觀止閒行入精
舍松竹風景美沿溪水琤琤當門石齒齒喜逢白髮僧
清言啓微旨冷月穿疎簾幽蘭供素几自悔三迴翔難
得四歡喜偶來仙靈窟便擬逍遙子半偈沉檀煙我聞
亦如是

書王叔明畫冊

王叔明畫冊十八幀假於吳興故家坐臥觀者一月竊

疑其真僞相半吾友顧餘冬往從吳興見一冊亦然殆
好事者剖爐斷鏡以欺世之鰕目者耳若真蹟八幀筆
格精嚴章法縝密如文在鼎如花錦別有一種精光
動人處吾家仲圭云王侯筆力能扛鼎五百年來無此
君今更五百年亦安有此君耶嗟乎古來法書名繪大
半蕩於兵火其僅免者或又遭霉爛蟲蛀此獨完好固
難得而可喜者而復割裂之可惜也爰作古詩附於衡
山跋尾之後

門前雪消水一尺清寂書堂來好客引我披圖叫奇絕
此是山樵真手迹蠶絲煙篆光離離銀宮雕匠雲顏師

一時二時目不暇十日五日神不疲
堅深如刻密如織
柔豪運出千鈞力老木似帶元氣生
童山猶含太古色
丹丘綿邈穹臺敞桃花溪深邨落廣
瀑水飛來玉女頭
雲聲湧出仙人掌秋江一舸影空青
風流依約鷗波亭
山橋斷截橫壁起孤客仰視鴻冥冥
玉葉蕭蕭飄粉絮
茅屋深林最深處暮山千疊景更奇
一抹殘陽山半度
世間何處無佳山都入山樵指顧間
便欲飛身入巖壑
清泉白石開蒼顏歎息良工費辛苦
雲衣裂斷誰能補
匹如絕代風騷將肯向屠門雜市賈
粉本流傳僞亂真
須知真者真精神願與煙雲作供養
世上豈惜凡金銀
苞裏還君興莫遏金莖脫口難消渴
使我迴腸空自牽
那能有愛從君割

葑園古體詩

一
四
五
六
七
八
九
十
十一
十二
十三
十四
十五
十六
十七
十八
十九
二十



